

庶物類纂

菌屬
自二至三

容

太政官文庫			
特別	和	書	門
一	二	三	六
二	三	四	二
第五十四番	函	號	類
四	六	五	冊



內閣文庫			
番號	和	32362	
冊數	465 (321)		
函號	特	54	1

九十向

共六








蘇州府印
芝類纂菌屬卷之二目次

蘇州府印

菌屬目次



芝

芝本作之篆文象草生地上之形後人借之字為語
 辭遂加草以別之也爾雅云茵芝也註云一歲三華
 瑞草或曰生於剛處曰茵生於柔處曰芝昔四皓采
 芝羣仙服食則芝亦菌屬可食者故移入菜部本草綱目
 芝類甚多亦有花實者本草惟以六芝標名然其種
 屬不可不識神農經云山川雲雨四時五行陰陽晝
 夜之精以生五色神芝為聖王休祥瑞應圖云芝草
 常以六月生春青夏紫秋白冬黑葛洪抱朴子云芝

有石芝木芝肉芝菌芝凡數百種也石芝石象生於海隅石山島嶼之涯肉芝狀如肉附於大石頭尾具有乃生物也赤者如珊瑚白者如截肪黑者如澤漆青者如翠羽黃者如紫金皆光明洞徹如堅冰也大者十餘斤小者三四斤凡求芝草入名山必以三月九月乃山開出神藥之月必以三輔時出三奇吉門到山須六陰之日明堂之時帶靈寶符牽白犬抱白雞包白鹽一斗及開山符撒著大石上執吳唐草一把入山神喜必得見芝須禹步往來以王相專和支

干相生之日刻以骨刀陰乾為末服乃有功效若人不至精久齋行穢德薄又不曉入山之術雖得其圖鬼神不以與人終不可得見也曰菌芝生深山之中大木之上泉水之側其狀或如宮室如龍虎如車馬如飛鳥五色無常凡百二十種自有圖也曰木威喜芝乃松脂淪地千年化為茯苓萬歲其上生小木狀似蓮花夜視有光持之甚滑燒之不焦帶之辟兵服之神仙曰飛節芝生千歲老松上皮中有脂狀如飛形服之長生曰木渠芝寄生大木上狀如蓮花九莖

一叢味甘而辛曰黃蘗芝生於千歲黃蘗根下有細根如縷服之地仙曰建木芝生於都廣其皮如纓其實如鸞曰參成芝赤色有光扣其枝葉如金石之音曰樊桃芝其木如籠其花如丹蘿其實如翠鳥並可服食曰千歲芝生枯木下根如坐人刻之有血血塗二足可行水隱形又可治病已上皆木芝也曰獨搖芝無風自動其莖大如斗指葉似莧根有大塊如斗周遶有細子十二枚繞之相去丈許生高山深谷服之神仙曰牛角芝生虎壽山及吳陵上狀似葱而特

出如牛角長三四尺青色曰龍仙芝似昇龍相負之形曰案珠芝莖黃葉赤實如李而紫色曰白符芝似梅大雪而花季冬而實曰朱草芝九曲三葉葉有實也其莖如針曰五德芝狀似樓殿五色各具方莖紫氣已上皆草芝也有百二十種人得服之神仙曰玉暗芝生於有玉之山狀似鳥獸色無常彩多似山水蒼玉亦如鮮明水晶曰七孔九光芝生於臨水石厓之間狀如盤盃有莖葉此芝葉有七孔夜見其光食至七枚七孔洞徹一名螢火芝曰石蜜芝生少室石

戶中石上終難得曰桂芝生石穴中似桂樹乃石也
光明味辛曰石腦芝石中黃皆石芝類也千歲燕千
歲蝙蝠千歲龜萬歲蟾蜍山中見小人皆肉芝類也
凡百二十種又按採芝圖云鳳凰芝生名山金玉間
服食一年與鳳凰俱也曰燕胎芝形如葵紫色有燕
象曰黑雲芝生山谷之陰黑蓋赤理墨莖味鹹苦又
有五色龍芝五方芝天芝地芝人芝山芝土芝石芝
金芝水芝火芝雷芝甘露芝青雲芝雲氣芝白虎芝
車馬芝太一芝等名狀不一張華博物志云名山生

神芝不死之草上芝為車馬中芝人形下芝六畜形
又按段成式酉陽雜俎云屋柱無故生芝者白主喪
赤主血黑主賊黃主喜形如人面者亡財如牛馬者
遠役如龜蛇者蠶耗時珍嘗疑芝乃腐朽餘氣所生
正如人生瘤贅而古今皆以為瑞草又云服食可仙
誠為迂謬近讀成式之言始知先得我所欲言其揆
一也又方士以木積溼處用藥傳之即生五色芝嘉
靖中王金嘗生以獻世宗此昔人所未言者不可不

知
同上

芝瑞艸也。生於剛處曰菌，生於柔處曰芝。昔四皓采芝，羣僊服食，則芝亦菌屬可食者。故採入菜部。李時珍曰：芝類甚多，不可不審。神農經云：山川雲雨，四時五行，陰陽晝夜之精，以生五色神芝。為聖王休祥瑞應圖云：芝艸常以六月生，春青夏紫，秋白冬黑。葛洪抱朴子云：芝有石芝、木芝、肉芝、菌芝，凡數百種也。石芝石象，生於海隅石山島嶼之涯，肉芝狀如肉，附於大石頭，尾具有乃生物也。赤者如珊瑚，白者如截肪，黑者如澤漆，青者如翠羽，黃者如紫金，皆光明洞徹。

如堅冰也。大者十餘斤，小者三四斤。凡求芝艸入名山，必以三月九月乃山開，出神藥之月，必以三輔時出三奇吉門到山，須六陰之日，明堂之時，帶靈寶符，牽白犬，抱白雞，包白鹽一斗，及開山符，檄著大石上。執吳唐艸一把入山，山神喜，必得見芝。須禹步往，采以王相專和，支干相生之日，刻以骨刀，陰乾為末，服乃有功效。若人不至精久齋行，穢德薄，又不曉入山之術，雖得其圖，鬼神不以與人，終不可得見也。曰菌，芝生深山之中，大木之上，泉水之側，其狀或如宮室。

如龍虎如車馬如飛鳥五色無常凡百二十種自有
圖也曰木威喜芝乃松脂淪地千年化為茯苓萬歲
其上生小木狀似蓮葉夜視有光持之甚滑燒之不
焦帶之辟兵服之神僊曰飛節芝生千歲老松上皮
中有脂狀如飛形服之長生曰木渠芝寄生大木上
狀如蓮華九莖一叢味甘而辛曰黃蘗芝生於千歲
黃蘗根下有細根如縷服之地僊曰建木芝生於都
廣其皮如纓其實如鸞曰桑成芝赤色有光扣其枝
葉如金石之音曰樊桃芝其木如籠其花如丹蘿其

實如翠鳥竝可服食曰千歲芝生枯木下根如坐人
刻之有血血塗二足可行水隱形延年卻疾已上皆
木芝也曰獨搖芝無風自動其莖大如手指根有大
魁如斗周旋有細子十二枝繞之相去丈許生高山
深谷服之神僊曰牛角芝生虎壽山及吳陵上狀似
葱而特出如牛角長三四尺青色曰龍仙芝似昇龍
相負之形曰紫珠芝莖黃葉赤實如李而紫色曰白
符芝似梅大雪而花季冬而實曰朱草芝九曲三葉
葉有實也其莖如鍼曰五德芝狀似樓殿五色各具

方莖紫氣已上皆艸芝也有百二十種人得服之神
僊曰玉暗芝生於有玉之山狀似鳥獸色無常彩多
似山水蒼玉亦如鮮明水晶曰七孔九光芝生於臨
水石厓之間狀如盤盃有莖葉此芝葉有七孔夜見
其光食至七枚七孔洞徹一名螢火芝曰石室芝生
少室石戶中石上不易得者曰桂芝生石室中似桂
樹乃石也光明味辛曰石腦芝石中黃皆石芝類也
千歲燕千歲蝙蝠千歲龜萬歲蟾蜍山中見小人皆
肉芝類也凡百二十種又按採芝圖云鳳凰芝生名

山金玉間服食一年與鳳凰俱也曰燕胎芝形如葵
紫色燕象曰黑雲芝生山谷之陰黑蓋赤理黑莖味
鹹苦又有五色龍芝五方芝天芝地芝人芝山芝土
芝石芝金芝水芝火芝雷芝甘露芝青雲芝白虎芝
車馬芝太一芝等芝名狀不一何本草止以六芝標
名已上數百種悉歸遺漏茲時具載以備世之哲人
高士為求仙延壽之一助云
明瀕湖李時珍食物本草
靈芝一名壽潛一名希夷故劉庭芝取以為字
今續古注

○元伊世珍瑯嬛記

芝有二其形同菌有紫白二色者生朽木之根汚壤之上謂之菌芝皆有莖長尺餘與靈芝相似豫章西山最多靈芝生於石上其形如石可服秋採之菌芝可種於堦前先松頑石之下以助仙興涵虛子臞仙秘傳神隱唐杜荀鶴庭前椿樹生二芝明年及第因名之曰科名草

張九齡居母喪不勝衰毀有紫芝產于座側

韓思復為滁州刺史有黃芝五株生州署

邵君協宰新昌五色靈芝十二枝生便坐之室

貞觀中滁州山原徧生芝草

天寶初臨川李嘉胤所居柱上生芝形類天尊

青龍元年五月庚辰神芝生長平之習陽其色紫丹

散為三十六莖似珊瑚之形以上明王蓋臣羣芳譜

浙江烏程縣大中丞潘印川季馴治河有功常築舍

于崑山下有芝生于庭始則一本色爛然紫繼乃日

盛生至百本扶踈偃仰照曜人目因標之曰芝林同上

芝號無根以其天所特產非人力也然載之圖經芝

牒不可勝數諸凡草木芝固貴而產於鐵石者謂之

玉芝昔東王父服蓬萊玉芝壽九萬歲赤松居崑崙嘗授神農服芝法而廣成居崆峒之上亦嘗以授軒轅水經言具茨山有軒轅受芝圖處上同

芝瑞草也一名三秀一名菌蠢神農經所傳五芝云赤者如珊瑚白者如截肪黑者如澤漆青者如翠羽黃者如紫金氣和暢王慈仁則芝草生玉莖紫筍又云聖人休祥有五色神芝含秀而吐榮論衡云芝草一年三花食之令人眉壽上同

靈芝仙品也山中採歸以籬盛置鉢甌上蒸熟晒乾

藏之不壞用錫作管套根插水瓶中伴以竹葉吉祥草則根不朽上盆亦用此法上同

開寶七年陳州節度党進獻芝一本四十九莖太平興國五年龍水縣華嚴寺舊截竹為引水筒忽生枝葉長二丈許至道元年潭州監軍解生竹一本長二尺許枝葉萬餘祥符元年秋八月王欽若獻芝八千一百三十九本九月趙安仁獻五色金玉丹紫芝八千七百一十一本冬十月王欽若等獻泰山芝三萬八千五十本有竝五連三連理者其似寶山靈禽瑞獸

象者凡六百四十二六年冬丁謂獻芝三萬七千一百八本十一月又獻芝九萬五千一百本明年真源民獻芝一萬八千本明當湖趙維稟雪廬讀史快編政和中花石綱起蘄州進芝一萬一千六百本汝州進芝六萬本其連理雙枝者一千八百八十有奇有司不勝紀後遂不復表賀時朱勝非提舉京東行部至密州見縣令部夫數百入山採芝瀰漫山谷皆芝菌或附木石或出平地至有一本數千葉層豐高大五色具備者郡守李文仲採及三十萬本每萬本作

一綱入貢文仲尋進本道轉運使同上

芝者菌蕈同類本非難得之物但以產於室內梁間非意得之故為瑞耳若山谷間朽木浥雨自然叢生朝夕雲霞薰蒸自成五色無足異者宋景德間天書興丁謂獻芝至十餘萬本政和間花石綱興郡守李文仲采及三十萬本有一本數千葉衆色咸備是可謂之瑞乎明陳留謝肇淛五雜俎丁謂真宗時為奉祀經度制置使判亳州帝賜宴賦詩以寵其行命權管勾駕前兵馬事謂獻白鹿并靈



芝九萬五千本宋史。集事。淵海。

機謹按日本紀皇極帝三年大和州菟田郡之押坂直雪中取菟田山之靈芝為羹食之長生其芝大六寸許生延亘百五十丈許之間

句曲山有五種神芝第三名燕脂芝色紫形如葵葉上有燕像食之可仙明范貞一典籍便覽

五指芝相州生長尺分七枝如手指最上類鳳又有冠冕狀神仙狀真武狀佛狀同上

五芝有石芝有木芝有草芝有肉芝有菌芝石芝赤

者如珊瑚白者如肪黑者如漆青如翠羽黃如紫金皆光明洞徹晦夜能照又有玉脂芝七明芝九光芝石芝有石蜜芝石桂芝石硫黃芝木芝有威喜芝飛節芝樊桃芝參成芝木渠芝建木芝木華芝黃蘗檀桓芝草芝有獨搖芝無風自動牛角芝龍僊芝麻母芝白符芝隱晨芝朱草芝五德芝龍銜芝肉芝則萬歲芝蝮千歲蝙蝠千歲靈龜風生獸千歲鷺之類菌芝狀如宮室或車馬或龍虎或人形或飛鳥五色無常已上五芝服之皆令人長生茅君句曲山有五種龍僊



參成燕胎夜光玉芝霍山有五香芝良常山有螢火
 芝神山有黃龍芝此外有人芝月芝山芝火芝鳳腦
 芝金蘭芝隱晨芝紫朱芝朱草芝赤雲芝月精芝黑
 芝金芝萬年芝夜光芝白雲芝雲母芝華芝鬼芝然
 則大觀政和間王欽若丁謂蔡京輩所進皆鬼目之
 類耳明王元美宛委餘編
 屋柱木無故生芝者白為喪赤為血黑為賊黃為善
 形如人面者亡財如牛馬者遠役如龜蛇者田禾耗
 明陳繼儒珍珠船

機謹按華夷花木鳥獸珍玩考田禾作田蠶

爾雅翼夫物之英華之美者莫如芝故蓮曰水芝芋

曰土芝蜜曰衆口芝薤曰菜芝明陳希顏事言要玄集

杜陽編處士伊祁玄解於衣帶間出三羊藥實為上

種於殿前一曰雙麟芝色褐一莖兩穗隱隱形似麟

頭尾悉具其中有子如瑟瑟明慎懋官華夷花木鳥獸珍玩考

東都生芝狀如樓閣又或如赤字者同上

柳宗元貽蕭俛書使受天澤餘潤雖朽枿敗腐不能

生植猶足蒸出芝菌以為瑞物同上

菌芝或生深山之中或生大木之下或生泉之側其
狀或如宮室或如車馬或如龍虎或如人形或如飛
鳥五色無常同上

機謹按一本無常下有凡百二十種五字

宋黃庭堅芝亭記云晉陵郡君叶為新昌宰視事之
三月靈芝五色十二莖生于便坐之室吏民來觀無
不動色相與言曰吾令尹殆將有嘉政以福我民乎
山川鬼神其前知之矣乃相與廓其室四達為亭而
來謁記于庭堅云云按新昌瑞芝是元祐八年事今

縣東二十五里有瑞芝橋乃元時產芝處

明陸能始名勝志

玉芝會稽陶宴嶺出花生葉下其根一歲生一曰取

其曰以麵裹炊熟吞之日三枚可以辟穀

明陸應陽廣輿記

紹興府

格物論曰芝瑞草也土氣和則生有五色黃者為喜

黑者為惡

瑞應圖曰芝英者王者親延耆養老有道則生

抱朴子曰芝有石芝木芝草芝肉芝菌芝百許種玉

脂芝如水精得而末之以無心草汁和之須臾成水

服一升得千歲

又曰青雲芝生於名山之陰大青石間青蓋三重上有雲氣覆之味辛甘以陰乾食之令人壽千歲不老能乘雲通天見鬼神

又曰黃龍芝生於神山之中狀如黃龍味辛甘以四時採陰乾治食日一食壽萬歲令人光澤

又曰金蘭芝生於名山之陰金石之間上有水蓋莖出入秋旬求之飲其中水壽千歲耳目聰明

又曰龍仙芝狀似升龍之相負葉為鱗其根則如蟠

龍服一株則壽千歲

機謹按藝文類聚相負作類

又曰珠芝其莖黃其葉赤其實如李而紫色二十四枚輒相連而垂如貫珠也

又曰朱草芝九曲曲有三葉三實

又曰蒼山岑石之中赤雲之下狀如人豎豎如連鼓其色如澤以夏採之陰乾食之令人乘雲龍上天觀見八極通見神明延壽萬年

機謹按藝文類聚雲之作雲芝龍作能

又曰山芝者韓衆所食也與天地相極延年壽通神明矣

又曰火芝常以夏採之葉上赤下莖青赤松子服之常在西王母前隨風上下往來東西

又曰人芝生名山之陰青蓋白莖乾治食日半合則使人壽入水可久也

又曰黑芝生於名山之陰大谷中白蓋赤莖味甘秋採之陰乾日食令人身輕齒堅與天地無極

又曰火芝生於名山之陽其色黃澤大如車蓋

又曰萬年芝令人不老延年九千

又曰金芝生於山無蓋青莖陰乾治食日一合不中風雷令人色光澤也

又曰雲母芝生於名山之陰青蓋赤莖味甘以季秋竹刀採之陰乾治食使人身光壽千歲醮以牛脯

又曰華芝生於名山之陽及出央山大谷源泉水中赤蓋白莖上有兩葉三實

又曰鬼芝青蓋長莖陰乾屑之日食五合所見神明令人長生

漢武內傳曰西王母之山上藥有大真紅芝草拾遺記曰崑崙山九層有芝田蕙圃羣仙種耨焉抱朴子曰蔡誕求仙三年飢凍還家欺家云吾為老君守視斑龍與諸仙博戲忽輸此龍為此罪見責送崑崙山下芸鋤芝草三四頃皆生細石中多荒穢治之勤苦不可論法當十年乃得原會僱任子王喬諸仙來接按行吾守請之並為吾作力且自放歸當更自修理求去

漢書曰武帝元封二年詔曰甘泉宮中產芝九莖連

葉上帝博臨不異下房其赦天下賜雲陽都百戶牛酒作芝房之歌

機謹按藝文類聚二年作六年

仲長子曰哀帝時有異物生於長樂宮延年殿後東廡樹及永巷南園合歡樹識者以為芝草

論衡曰建初三年零陵泉縣女子博寧宅内生芝五本長者尺四寸短者七八寸葉莖紫色蓋紫芝也太守沈鄴遣門下掾奏獻皇帝悅懌賜錢衣詔會公卿郡國上計吏皆以芝草告示天下

雜俎曰武宗起望仙臺空中生靈芝二株色同紅玉
邵氏聞見錄曰仁宗降誕章懿后榻下生靈芝一本
四十二葉以應享國四十二年之瑞云
新唐書曰杜荀鶴庭前椿樹生二芝明年及第因名
之曰科名草

宋史曰徽宗政和中蘄州產芝徧境計黃芝一萬一
千六百本內一本紫色九幹尤奇

古今詩話曰宣和間王將明賜第以梁生芝草為奏
車駕臨幸適久雨梅潤芝墜地京師為十七字詩曰

相公新賜第梁上生芝草為甚脫下來膠少

尸子曰赤縣洲者實為崑崙之墟土紅芝草生焉食

其一實而醉臥三百歲而後醒以上淵鑑類函

靈芝一名三秀王者德仁則生非市食之菌乃瑞草

也種類不同惟黃紫二色者山中常有其形如鹿角

或如繖蓋皆堅實芳香叩之有聲服食家多採歸以

籬盛置飯甑上蒸熟晒乾藏久不壞備作道糧又芝

草一年三花食之令人長生然芝雖稟山川靈異而

生亦可種植道家植芝法每以糯米飯搗爛加雄黃

鹿頭血包曝乾冬笋候冬至日埋於土中自出或灌藥入老樹腐爛處來年雷雨後即可得各色靈芝矣雅人取置盆松之下蘭蕙之中甚有逸致且能耐久不壞

附靈芝釋名 共計四十一品

五色芝 五品

赤芝

一名丹芝色如珊瑚其艷麗異常生於衡山食之輕身延年

黃芝

一名金芝色如紫金光明洞徹多產於嵩山之上下食之不老

黑芝

一名玄芝色如澤漆其光潤可愛生於常山

青芝

一名龍芝色若翡翠之羽多產於泰山

黑芝

一名素芝色如截肪生華山唐時延英殿御座上生玉芝一莖有三花

木芝 十一品

千歲芝

生於枯木下根如坐人刻之有血取血塗之足可行水隱形延年却疾者

木威喜芝

似松脂淪地化為伏苓歲久上生小木狀似蓮花夜視有光燒之不焦服之得仙

飛節芝

生於千年老松上皮中有脂其狀如飛舞服之可以長生

木渠芝

寄生大木上狀似蓮花而一叢有九莖味則甘而帶辛

黃蘗芝

生於千年黃蘗根下另有細根如絲縷服之可得地仙

參成芝

赤色有光扣其枝建木芝 生都廣皮如葉如金石之音

五德芝 其形如車馬食之者壽可得千歲 樊桃芝 本如籠花如丹

九光芝 形如盤棹生臨水之高山頂

九莖芝 一幹九莖其色紅黃可愛漢元封中生于甘泉殿齋房

草芝 十三品

龍仙芝 形似昇龍相負食之可長生 白雲芝 生名山白石之陰有白雲時覆其上

青雲芝 青蓋三重其理則赤食之主壽 獨搖芝 根大如斗莖粗如指能無風自動

牛角芝 生虎壽山形似葱而特出類角 紫珠芝 莖黃葉赤實如李而紫色生藍田

火芝 赤葉而莖青昔為赤松子之所服 九曲芝 九曲每曲三葉實似梅大雪開花 夜光芝 生華陽洞山陰有至季冬始實

白符芝 似梅大雪開花 五色光浮其上

鳳腦芝 其苗如匏而結實若桃 雲母芝 生山陰時有雲護秋採食令人身輕

金芝 漢元康中金芝九莖連葉生于函德殿銅池又唐上元二年含輝院產金芝

石芝 七品

玉暗芝 生于有玉之山狀似鳥獸色無常粉多似山水蒼玉亦有如鮮明之水晶者

七明芝 生臨水石崖間葉有七孔實堅如石夜見其光若食至七枚則七孔洞然矣

石蜜芝 生少室石戶中乃不易得者 桂芝 石也色光明似桂樹乃

石腦芝 出白石中 金蘭芝 冬生于山陰金石而色黃

月精芝 秋生山陽石上莖青上赤味辛

肉芝 五品

人掌芝

蘭陵蕭靜之掘地得一物類人掌烹食之後遇一人人見其神氣不凡語曰子得食肉芝自此壽可

等乎龜鶴矣

明成化間長洲產肉芝其形類蝙蝠人皆以為異而特誌之

千歲龜

千歲蟾蜍

燕胎芝

因其形似皆肉芝也

芝原仙品其形色變幻莫可端倪故有靈芝之稱惟有緣者得遇之耳據採芝圖所載名目有數百種茲止錄其十分之三以備山林高隱之士為服食參攷之一助也

以上清西湖花隱陳湜子秘傳花鏡

芝有五色服食成仙者溢言耳木威喜芝類即松脂

入地所化其上生小木若蓮花夜有光持之滑燒之不焦佩之辟兵蔡條云政和間芝動二三萬本蘄黃間一鋪二十五里遍野而出王元美言嘉靖中各省進五色芝者无萬數也多藥成者上好祥瑞何難紫脫朱艸滿天下邪潛艸曰搗糯米飴雄黃及鹿頭血或碎其角加諸色藥包暴乾冬筍冬至日埋之或灌藥入老樹爛椿明春雷雨即生五色芝高山生水晶蘭獨枝白瑩乃白芝也

清皖桐方氏浮山此藏軒物理小識

庶物類纂
卷三

庶物類纂菌屬卷之三目次

芝

庶物類纂
卷三

菌屬目次

芝

芝章伊切音之瑞艸無根而生博物志曰各山生神
 芝不死草上芝車馬形中芝人形下之芝六畜形埤
 雅廣要曰本艸有青赤黃白黑紫六色今所見惟黃
 紫二色或如鹿角或如繖蓋皆堅實芳香叩之有聲
 又禮燕食所加庶羞有芝菌栴蓩棋王充論衡土氣
 和芝艸生又瑞命記王者德仁則芝艸生漢舊儀曰
 芝有九莖金色綠葉朱實夜有光又玉芝名瑤艸江
 淹登廬山詩瑤艸正翕葩李善註玉芝也本草經曰

白芝一名玉芝齊民要術曰紫脫北方物即芝也孫氏瑞應記曰紫蓬王融曲水序紫脫華朱英秀又本艸水芝荷也土芝芋也又石耳亦名芝生石崖上味甘平又一種名木樗朽株上生名木樗賀氏曰芝木樗也一種胡茵天陰生糞壤上見日則死名大芝又姓○世傳神農經及瑞應圖五芝經芝草圖後稱芝百二十餘種史漢武元封元年甘泉宮產芝九莖宣神爵元年產金芝章元和二年芝生沛建初五年芝出潁川靈光和四年郡國上芝英自漢以來往往以

芝艸告示天下獨宋仁宗皇祐三年詔州縣勿獻瑞物知無為軍茹孝標進芝艸上曰朕以豐年為瑞賢臣為寶艸木之異焉足尚哉按真宗祥符中封泰山四方以芝來告者萬數其大吏則天子賜書以寵之小吏若民則賜金帛王安石為大丘陳君作芝閣記寓諷清廖文英正字通丙申歲自四月至六月大雨而余之所客天長縣東北皆瀕湖澤地浸以下頗以水為患傷草木多死邑居無薪芻而益貴薪益來自遠以余之所居則薪之

自北來者常售於余間而有得若枯華斷穎根梗蒂芥支離擁腫與碩實所異於常草者皆取以戲就其中嘗試視之余得則芝也折傷不完計之於全此當一葉耳不如其他安在也其生雖不知遠近要皆在縣之北以常負薪之所來則芝從可知也示人則不齊有由是而知有芝有由是而信為芝有雖得是而弗之信者然芝之為物不常有而或出可愛者也自古詩之作見於今者凡三百篇其以風賦比興而附見於物若蘋蘩薇蕨苞苦霍蕘唐菖蘧瓠瓜葛

鬱萸葵蕒葑芥藻莫茅荼蔞苓蓬莠華蒿萇蒲萑葦葭蒹蕭艾稂菽蓍芑禾麻菽麥黍稷豆菽秬秠糜粟稻粱菅苧卷耳芣苢菁莪莠萋荷華游龍茹蘆芍藥之類雜見並出然此特草耳其多蓋如此而未嘗及芝也自詩而下長辭章而善自托者獨有屈原今其離騷九歌具存而可考然其况意所及自詩人所紀之外復益以江蘺芙蓉杜若薜荔木蘭白蘋菑葦揭車蕙芷茝菊芰蘅蕓葦施蕪葍蓀而地所常產目所同識之草盡矣若夫陳忠直私忿廢而怨逐託於彼

而取此以見義此則余之所知至於道則余不得而
一也然稱類已衆而芝復獨遺是誠何故邪說者遂
以九歌之三秀為芝余以其不明又其辭曰適山而
採之則芝非獨山草蓋未足據信也及觀漢樂歌蓋
當時文工繁人緣飾世治以裁主意耳非有如詩人
騷客鬱於中而不得言憑於物而後見者皆非余所
好也今余得芝而賦之意皆在於賦序故不道也
宋王
令藏芝賦序。清陳元龍御定歷代賦彙
章帝建初三年十二月零陵獻芝草零陵女子傳寧

宅土中忽生芝草五本長者尺四五寸短者七八寸
莖葉紫色大守沈鄴遣門下掾衍盛以獻皇帝悅憚
賜錢衣服
零陵縣志

大中祥符元年十二月懷安縣龍眼樹上紫芝連理
二年正月荔枝樹生連理芝二本四年四月古田縣
僧舍竹一本上分三莖五年十二月候官縣山上生
芝草五十四本閩縣望泉寺生芝草十本七年四月
獻芝草二本
八閩通志

崇禎五月鄒平芝草叢生百餘本
濟南府志

明萬曆辛卯秋有芝生于縣署之左折之復生始如
白玉其後文成五彩明年夏復生黃芝二莖于縣署
之右寧海縣志

崇禎十二年相城鄉刺蓬滿地無根自生枯轉隨風
人謂之離鄉草蔣山日夜吼鳴如雷冬相城鄉磷石
坡產芝一本如箕宿州志

崇禎己卯儒學東齋榴樹下生芝一本二朵如紫雲
寶蓋有分取其半者繼收而合之仍發榮如初五彩
絢爛數月不萎雋州縣志

祥符二年九月安鄉謝山芝草生二十二本狀如珊

瑚岳州府志

瑞芝洪武四年瑞芝生于海塘洪氏家園宋景濂記
其事隆慶二年蔣氏築基得靈芝于土中五色燦然
不壞萬曆十六年生于倪氏祖塋嘉靖間張氏祠廟
初建有芝如扇生梁上又復見縣東山數十本浦江縣志

弘治壬戌戟門左順坊產芝五其首如雲五色備者
二綠勝諸色而禿者三是年袁犀潭陞僉事後二年
甲子謝恩舉于鄉寧鄉縣志

宋理宗景定八年城南楊子橋開福寺大士殿基產

芝三莖大者廣八寸色間紫赤寶祐四年春正月泰興縣城南

常村民家生芝草一本三莖九葉長一尺四寸其色紫赤。揚州府志

明成化十九年癸卯府學大成殿右柱產芝赤色六

出汝陽縣志

天寶初邑人李嘉嗣所居柱上生靈芝肖天尊像刺

史張景佚上之朝撫州府志

浮梁紹定間宣聖殿產瑞芝二本黃房紫萼十二層

十六葉見理宗實錄饒州府志

紫芝在城內西南宋皇祐間產紫芝三百五十本郡

守茹考標獻於朝廬州府志

李忠定公序鄧正言瑞芝軒其畧云宣和二年中夏

有芝生于沙場鄧肅志宏之家大小凡十有二色狀

異常叢者特者仰者紫者如甚黃者如金輪困燁燁

真瑞芝也前史記孝行之美多以芝產其廬為祥柳

子厚有言曰朽枿使受天澤餘潤猶能蒸出芝蘭以

為瑞物志宏銳意文辭期于有成以顯其親則是芝

之生非孝誠所感文字之祥助梁溪李綱為名其軒

使藏芝其間俱出本志

論曰余嘗讀王摩詰集紀王相國紫芝木似之祥謂其至孝所感為國之瑞至畫圖以進藏之書府心竊異之今觀李忠定所記鄧正言瑞芝亦然固所謂休徵者非邪余宅憂之次年八月為嘉靖乙卯先大夫中憲公綸墓右側生芝一朵自石罅中迸出色紫艷經月不謝鄉人異之明年丙辰八月復生芝于舊處色辨如前所謂葉似仙人之蓋色奪齊侯之衣亦庶幾焉於虜余甚耻劣何敢望前人然靈芝之產瑞應

頗有同者其聖明在上醇和之氣形于草木致然歟余不敢以嫌于夸自諱敢附記于茲俟史氏或有采

焉以上延平府志

芝菌正德辛亥郡庠泮池生芝太守沈綸德政所致嘉靖丙午夏張都閫轅產芝時其母王氏以貞節表其閭郡守胡鰲前翰林編修謫提舉潘仲驂咸有紀讚云嘉靖癸丑振舍旁叢林中瓦礫之上產芝五莖高五寸餘葉徑四寸五色皆備日耀之燁然有光其幹如漆內一本若並蒂然環地四圍及其上約丈餘

咸有黃氣若塵埃着人衣作黃色不可去時五月五

日也芝久作紫色今藏之戊午歲子里中祖復產一

菌瑩白如玉尤絕異詳鍾振舊紀廉州府志

宋慶曆五年秋八月芝草生洪州之章江禪院高一

尺三寸葉二十一層色白黃有紫暈旁生小芝葉九

層上有氣如煙時新建隸洪州新建縣志

機謹按南昌府志無時新建隸洪州六字

鄭松金瑞芝記上一枝乙卯仲夏生下一枝丙辰孟秋生○夫瑞生必於

嘉土和氣應乎善政蓋士之非常則必有善政政之

既善則和氣可立致和氣充塞則天地之祥必應矣

所以嘉禾興而朱草生也迺者明昌二年秋侯公以

進士登第宰政斯邑繼而秩滿赴調復為此宰自乙

卯初春視事之後凡所積弊害民者無不除之以至

舉善禁姦興化致理雖漢唐之循吏曾不是過是以

居民樂業怡懌歡欣莫不遂性故當召和氣而獲休

應也果於是年月在仲夏於縣舍之東生芝草一本

輪困如紫雲狀公以謂非已致但加賞愛而已及明

年之秋復於其地并產二莖其上則合而一焉所謂

連理枝者也。縣民觀者駢肩接武，皆欣欣然而相告曰：我生以來未嘗識此，可得聞而不可見也。豈非我公之善政致然耶？無乃我公復來之應也。抑亦令佐同心協德之驗與？不然，何以臻此？則周書所謂唐叔得禾，異畝同穎者，其類於此，可不獻之於上而俾太史書祥以表皇朝太平瑞應之一事乎？寧陵縣志

萬物生於天地之間，均一氣也。人特秀而靈者，故其吉凶禍福善惡妖祥各以類至。應疾桴鼓不可誣也。上高之西距邑八十里，大觀二年六月二十有五日。

有靈芝生陳氏之圃，會之得二三年，枝朱莖黃英爛然交錯，敷舒炳煥，端如雲霞之態。心雖善繪象不能圖也。宗族閭里奔走以賀，穎川生不敢有上之邑縣大夫以仁惠慈愛之政，涵養一邦，殆其瑞也。令聞而辭上之郡曰：刺史以忠和愷悌之政，風動千里，此其應歟。太守不自以為私上之朝廷，歌誦天子之德，為太平之佳祥。上方躬道德以惇信厚，退托廉損抑而不受。若曰：陰陽至和之氣，薰陶生植之自然耶？余聞曰：吉凶之報，豈偶然哉！此乃崇寧睿主追述先烈以

孝理天下筠之守令承宣風教達之民而不壅陳氏能從上之化以孝行卓出鄉閭間此芝所以為國家祥為郡邑瑞為陳氏慶一也陳氏名彥輔學為儒者也少能沈靜有守孝悌嫻睦為衆所推服父名遠隱醫雖無志於學而慈愛禮遜出於天性能調人之急施貧窮上下百里間以砭劑活死者不可計四方士來者咸食之門下累月不厭真可尚也圃中有堂名慶芝求計其事余固樂道人之善於是乎書

宋李拱慶芝堂

記上高縣志

不孝水堦山莊在余家勅修世墓之左實開府菑塘祖故業菑塘祖嘗扁其堂曰尚書舊墅蓋溯其源也余不孝甫襄先慈大事以山莊僻靜聽兩兒一孫肄業其中會菊月明生之辰兒輩問不孝曰余樓之傍產物有光形如雲蓋色潤蒼黃九莖一本厥名何祥不孝乃泫然流涕曰此瑞草也其名為芝氣和乃產同鳳麟意噫嘻乎彼胡為生也生非其地庶草何異生非其時幾以茵遺噫嘻乎彼胡為乎生也時有友人乃謬向予而賀曰此孝芝也子之事母盡物盡志

哀毀過情孝思無二天憐其誠祥發表異不孝因頓首悲號而稱謝曰不孝獲戾深重禍延先慈終天之恨罔極之思恐粉骨莫贖也不孝其何以當之友人復謬向予而賀曰謝家玉樹階庭芝蘭比若孫子毓秀琅玕仁者昌後鳳翥龍蟠天為產瑞示以造端不孝愈抱慚含泣厝躬無地稽首而再謝曰諸頑不慧如淵明兒雖好紙筆尚遠裘箕守我家訓儘不乖離此又何足以堪之友人曰如子持論此祥奚宜不在今日想有異時子乃多讓當歸之誰不孝乃颺言曰

芝仁草也地主仁慈則芝生獨不聞邵宰新昌靈芝生坐今有仁候龔黃聲播余殞先慈高軒一過賁趾呈祥當為候賀友人亦首肯而賡余曰子言誠是惟候之趾子言是祥惟候可當子如不記後何以示記如不備後何以徵子其摘藻為後人考不孝搦管作記而亂之曰天不愛瑞地不隱祥芝生先墅吐秀含芳歸之余孝余孝未到歸之諸郎諸郎失數惟屬我侯志獲願酬我侯不有始以記我樓王治寧紫芝樓記。曹縣志瑞應圖芝艸有五種石生水生木生土生叢艸而生

者各以方色言之。金色者為上，瑞朱蓋紫莖者次之。朱艸又次之，其餘相次不等。或有獨莖而生者，有叢生九莖者，凡所生者皆傍有性之物，未聞於乾木無津液處而生者。武安縣於古最為盛，自春秋戰國至漢唐宋皆為名縣。人淳地秀，山產為諸縣最，所出名士大夫，唐宋暨金，儒風為盛，高第為名，臣名守者，比比皆是也。故文廟於他縣為備，自天兵南下，誤為山寇所焚，惟餘基存焉。至元三年，宰公王潤始翦荆棘，立縣學。今大原王公長卿慨廟貌不存，除自捐俸，又

倡圓頂黃冠，儒人醫卜屬官縣吏暨好事之家，出自願財以立正殿。匠者引繩興工於斧落成，乾拱上出金色瑞芝一本，叢生九莖，曄曄而秀，煌煌而明。三秀六英，扣之有金玉之聲，觀者雲集，耆老相告曰：此吾宰公修文廟之應瑞也。前朝時重修文廟，石礎上生一莖，今吾宰公修文廟，應瑞又甚於前日。殆文教復興之應也。今之人所喜修飾者，或祀典不載，妄求福利而修之於文廟，為不急獨吾宰叔立吾聖人之殿，俾後學有所歸向，知禮義孝慈入事父兄，出事公卿。

皆有次第芝之為瑞也宜焉故記之元楊威文廟瑞芝記。武安縣志

至元元年十二年芝草生於覆舟山一本五榦高尺有二寸一本二榦高五寸有半皆兩岐二本相依附瑰竒如珊瑚枝其高者結為華蓋慶雲之狀十二月朔荆門州以獻元楊威文廟瑞芝記。當陽縣志

順治甲午秋南鵞橋莊東產靈芝數畝紫色光如漆居人誤以為菌競採之則堅不可食淄川縣志

政和五年八月蘄州進芝草凡一萬二千六百枝內

有一枝紫色九幹湖廣總志

芝草巖在西尖之西昔有采藥者見芝草一本五色接長竿採之其色遂沒後數日左右各出一本皆翠色遂不復采徑山天目合志

句曲山五芝求之者投金環二雙於石間勿顧念必得矣第一芝名龍仙食之為太極仙第二芝名參成食之為太極大夫第三芝名燕胎食之為正一郎中第四芝名夜光洞鼻食之為太清左御史第五芝名料玉食之為三官真御史江寧府志

機 謹按華夷花木鳥獸珍玩考同

靈芝天順己卯文廟前產靈芝一根初秀一莖再秀
二莖三秀一叢九莖始微白終絳色馨香四溢是秋
姜英中式周序有賦見藝文壽寧縣志

明嘉靖四十一年知縣沈桂開井得靈芝紅白二本
見舊志會昌縣志

萬曆十五年府學文廟左楹產金色芝一本其香異
常沅陵縣志

至元八年辛未產金芝九莖於文廟乾拱上叩之有

金石聲武安縣志

太元內傳有神芝五種一曰龍仙芝二曰參成芝三
曰燕胎芝四曰夜光洞艸五曰白菘玉芝丹徒縣志

芝草各縣山中有之偶生人家便以為瑞亦世俗之
態也肇慶府志

芝神草王者德至草木則芝草生善養老則芝茂杭州府志

芝瑞草或曰生于剛處曰菌生于柔處曰芝安慶府志
芝高高山記云高山靈數有神芝仙藥別錄云黃芝

生高山宋建中靖國元年少林寺產靈芝大小十二
本守臣繪圖奏聞取入內府後將芝圖摹刻石碑今
在寺中十二芝名曰抱石黃曰小紫團曰金黃曰覆
頭黃曰黑團曰印子黃曰鵝黃曰小霞江曰僧竺紫
曰鴨脚黃曰花葉紫曰大紫團嵩書
按芝與菌蕈等皆不種而生菌蕈是土木氣所蒸而
生芝是天地和氣所蒸而生故芝瑞草也世不常有
太平縣志
五芝許邁云天台臨海山多有仙人芝草耳目記亦

云赤城山頂有青芝二根天台賦云五芝含秀而晨
敷注云赤芝黃芝白芝黑芝紫芝也又有六芝神農
經曰上藥養命謂玉石之練形六芝之延年天台山方外志

庶物類纂
卷三

